


www.BibleForChildren.org


Mataayo 26




Bhunu :gyariga
gisigaaye nsiku
sansabha okuyika
mu-nsikukuru ya
Ipaasaka, Yeesu ^naayika
kweki Bhetaaniya, mw-igunguri
rinu Yeesu :aasuuriye-mo
Raajaaro okusooka
mu-bhafuuye. Mmbe,
Maryamu ^naagega inchupa ya
amafuta amarange ga obhugusi
bhunene, ^naayaka Yeesu ku-maguru,
^naamufwafuuta na ginfwiri gyaye. linyumba
yoone kutyo niiranga ebhirange bhiyo.



Niwe Yuuda Esikariyooti, owumwi wa abheeyigira ekumi na bhabhiri abha Yeesu bharya, ^naagenda ku-bhashengesi abhakuru, okwaikana nabho, amugure. Bhunu :bhoonguuywe amang'ana gayo, mbajomerwa muno. Mbamuraga okumuyaana giiyera. Niwe Yuuda ^naamba okwagara omwanya omujomu gwa okurya Yeesu injeejemo amugure.



Abheeyigira bhaaye mbagenda
mbakora rwa kutyo Yeesu
:aabharagiriiye, mbaroosha
ebhyokurya bhya Ipaasaka. Mmbe,
bhunu :bhaariga mbarya, Yeesu
^naagega omukaate, ^naakumya
Nyamuwanga, ^naagubhaturabhutura,
^naayaana abheeyigira bhaaye,
^naabhabhwira ati, “Mugege
murye, omukaate
gunu nigwo
omubhiri gwani.”



^Naagega ekikombe kya iidivaayi,
^naakumya Nyamuwanga,
^naabhayaana, ^naabhabhwira ati,
“Mugege iidivaayi inu,
mubhabhushaanye mwone kutyo.
Iidivaayi iyo nigo amaanyinga gaani
aga iimuuma. Amaanyinga gaani
agaaja okwitika ku-nsonga ya
abhaanu bhaafu, insonga
Nyamuwanga
abhaabhire
ebhikayo.”



Yeesu ^naaika ati, “Awe, awe Simooni Peetero!
litegeeresha, Sitaani eekirisiibhwe abhawungure rwa
omuunu unu kaawungura obhuro. Nawe,
naakusabhiiye ku-Nyamuwanga, obhwikirisha bhwawo
bhutaaja okusuuwa. Na bhunu urinsubhira,
usimbiishe abheejaanyu.”



Simooni ^naamusubhya ati, “Raatabhugenyi waani! Nikabha amwi na awe neetuuye-wo okugenda okubhoywa na awe mu-jeera. Bhaakeenda okunyita, bhaanyite!” Yeesu ^naamusubhya ati, “Awe Peetero! Enikubhwira ati insarigooko itakukookoroma reero, ukyari kunyiigaana kasatu ati utakuumenya.”



Mmbe, Yeesu ^naagenda
na abheeyigira bhaaye
mw-isambu rinu
:ryatogwaga
ati Getisemane,
^naabhabhwira ati,
“Mwikare anu okwamba,
anye enigenda erya
okusaasaama
Nyamuwanga.”




^Naaika ati, “Abha,” insonga
yeende-ko, Raata,
“Amang’ana goone kutyo
agaturikana ku-awe.
Enikusabha usige
okuntusha ku-bhinyansho
bhiyo. Nawe itari kutyo
anye eneenda, tari ukore
kutyo awe omwene
oweenda.”



Mmbe, Yuuda ^naatangasha abhaanu bharimo abhasirikare, na abhajuuma bhanu :bhaariga bhasookere ku-bhashengesi abhakuru na ku-Bhafarisaayo. Mbagenda mw-isambu riyo, bhagwatiriiyega gintara, amasiriira na ebhigwato. Owumwi weebhwe ^naabhuma omugaya wa omushengesi omukuru, ^naamusaawura-ko okutwi okwa ebhuryo. Yeesu ^naabhasubhya ^naaika ati, “Musige okukora kutyo!” ^Naamukuun’ya ku-kutwi, omujuuma uyo ^naawora.



Kimwi, abhaanu bhayo mbasangira Yeesu,
mbamugwata, mbamusira ewa omushengesi omukuru.
Peetero ^naamuseeta ariwo areera. Bhunu
abhaanu :bhaayikire
mw-ibhanja rya mu-musi
muyo, mbakooma omuriro,
mbeekara amwi. Peetero
woone ^neekara
amwi nabho.




Nawe owumwi wa
abhagaya bha
omushengesi omukuru
unu :aariga ari muyiiri
wa omuunu unu Peetero
:aasaawuuye-ko okutwi,
^naamubhuusha ati, “Angu,
anye nitaakurora akabhaga
kanu waawuri amwi na Yeesu
mw-isambu?” Peetero ^neegaana
kweki ati, “Atari anye.” Kimwi
insarigooko niikookoroma. Peetero
^naawuruka anja, ^naamba okurira muno.




Mmbe, abhakuru bhayo mbayambaara
bhoone kutyo, mbasira Yeesu
ku-mutungi wa Ekiruumi unu :aariga
^naatogwa Piraato. Niwe, Piraato
^naabhuusha Yeesu ati, “Angu,
ni awe omukama wa
Abhayawudi?” Yeesu
woone ^naamusubhya ati,
“Ni awe owaaika.” Mmbe
Piraato :aariga ^neenda

okutaatira Yeesu, ^naaika nabho
kweki. Nawe, mbaamura
obhuraka mbaaika ati,
“Musunge ku-musarabha!
Musunge ku-musarabha!”




Mmbe, Piraato ^naabhayaana Yeesu,
insonga asungwe ku-musarabha.
Mmbe, abhasirikare mbamugega
mbagenda nawe. Yeesu ^neetwika
omusarabha gwaye, mbeemuka ayo,
mbagenda anu :aabhirikirwaga
mu-Kiebhuraaniya ati, Gorigota,
insonga yeende-ko ni kiima kinu
:kyasusanaga na ekiyanga.




Bhunu :bhaayikire Gorigota ayo,
mbamusunga ku-musarabha.

Anu :bhaamusungiiye, :bhaariga
bhasungire-wo abhaanu
abhandi bhabhiri,
owumwi enu na
owundi enu,
bhamutuuyega
agati.



Bhunu :yaayikire mu-mwisi mw-isuubha rya mu-ruwotoosi, ekyaro kyone kutyo nkibha kisuute okuyikira anu ginsa :gyayikire kenda, riisuubha :ryariga risimiriye. Mw-iyekaru :rwariga rurimo orugito rwa ingibho, ndutamuka ayoayo mabhaara gabhiri. Yeesu ^naamura obhuraka ^naarira ati, “Ee Raata! Enituura omwoyo gwani mu-mabhoko gaawo.”



Bhunu :yaayikire keegoro, kwa okubha
mwejo :yaariga iri Nsabhaato,
^naaja omuunu unu :aariga
^naatogwa Yuusufu, ari
mwibhurwa wa mu-musi
gwa Arimataaya.
Yuusufu uyo :aariga
ari owumwi wa
abhakuru
mw-ibharaja rya


Abhayawudi,
ari na ekibharo
muno, woone :aariga
^naarindirira okuuja
kwa obhukama bhwa
Nyamuwanga.
:Atoobhayire ^naagenda
ku-Piraato
okumwisaasaama
amwikirisishe agende
agege omubhiri
gwa Yeesu.



Niwe Yuusufu ^naagura insanda iinyeru.
^Naagenda ^neesha omubhiri gwa
Yeesu, ^naagufwafya insanda.
^Naagubhiika mu-mbiiyira
inu :yaariga iroosiibhwe
mw-itare,
^naasiringisha egina
enene ^naasibha
omuryango gwa
imbiiyira.



Mwejo, :yaariga iri Nsabhaato,
abhashengesi abhakuru
na Abhafarisaayo
mbasangira ku-Piraato.
Mbabhwira Piraato ati,
“Ee raatabhugenyi,
kyayiita ati bhunu
omubheeyi wurya
:aariga ari
muworu,” . . .



... “:aaikire ati, ‘Orusuku rwa akasatu,
nirisuuka okusooka mu-bhafuuye.’”


Niwembagenda kumbiyira,
mbatuura-koekibharikisho
kw-igina ati omuunu
akarisoocha-wo
bhamenye.

Abhasir-ikare
mbasigara-wo
mbaangarira
imbiiyira.




Bhunu Insabhaato :yaawooye, niibha
mu-ruguru Ekya obhwoyo,
Maryamu Magidarena na
Maryamu owundi wurya,
mbagenda okuringira
imbiiyira. Mbataka era,
riinyamutikima enene
nditura, kwa okubha
maraayika wa


Raatabhugenyi
Nyamuwanga
:eekire okusooka
mu-rwire.



Maraayika uyo ^naaja ku-mbiiyira ayo,
^naasiringisisha riigina rirya
ku-mbarika, ^naariikara-ko.
Bhunu abhasirikare bhanu
:bhaariga bhari ayo
:bhaarorere gayo,
mboobhaya muno,
mbayarara, kimwi
mbabha rwa
abhafu-uye.




Niwe maraayika uyo ^naabhwira
abhagasi bhayo ati, “Musige
okuubhaya! Nimenyere ati
omwagara Yeesu unu
:aasungirwe
ku-musarabha.
Atariwo anu!
Aasuukire, rwa
kutyo :aariga
abhabhwiriye.



Muuje mureore anu
:bhaariga
bhamumaamiishe.”




Niwe abhagasi bhayo mbasooka
mu-mbiiyira ayo bhwangubhwangu
bhayayire, enu bhajomeeywe muno.
Mbabhirima mbagenda okubhwira
abheeyigira bha Yeesu ganu
maraayika aabhabhwira.




Mmbe, bhunu :bhaariga mbagenda,
mbataka era mbanyookana na Yeesu.

Yeesu ^naabhakeesha ati,
“Mwawongera-mo!”

Mbamufugerera mbamugwata
amaguru, mbamuramy.





Yeesu ^naamara ^neeyeresha ku-bheeyigira bhaaye ekumi na wumwi. Bhunu :bhaariga mbarya, ^naabhagonya ku-nsonga ya obhukomeeye bhwa emitima gyebhwe, kwa okubha :bhaaremere okwikirisha amang'ana ga abheejaabho bhanu :bhaamurorere bhunu :aasuukire mu-bhafuuye.

Bhunu Raatabhugenyi Yeesu :aamarire okubhabhwira gayo, ^neemusibhwa okugenda mu-rwire, ^neekara ebhuryo ku-Nyamuwanga.



Nyamuwanga
:eendere muno abhaanu bhoone kutyo
abha mu-kyaro. Obhwendi bhuyo
mbukora ^naatuma omwana waaye
omumwemwe, insonga omuunu
woonewoone unu kaamwikirisha
asige okubhura, tari abhe na
obhurame bhunu
bhutakuweera.



Abharuumi 3:23

kwa okubha abhaanu bhoone kutyo bhakorere ebhikayo,
ebhikorwa bhyebhwe bhitakweresha obhugungyo
bhwa Nyamuwanga.

Abharuumi 6:23

Indiyo ya obhukosi bhwa ebhikayo ni rufu, tari
ekiyaanwa kya Nyamuwanga okuturira ku-Kiriisitu Yeesu,
Raatabhugenyi weeswe, ni bhurame bhunu bhutakuweera.

Abhaebhuraaniya 9:27

Rwa kutyo abhaanu bhoone kutyo bhatuuriywe-wo
okufwa rumwi era, na bhakamara okufwa mbaramurirwa
na Nyamuwanga.



Abhaefeso 2:8,9

Ni nema ya Nyamuwanga niyo ibheerusiishe okuturira ku-bhwikirisha bhwemwe, itari ati Omwerusibhwa okuturira ku-bhikorwa bhyemwe ebhijomu. Gunu ni musanga okusooka ku-Nyamuwanga omwene. Obhwerushwa bhutari ku-bhikorwa bhyemwe, insonga muunu woonewoone aasiga okwikumangya.

Abharuumi 10:9,10

Enaaika kutyo kwa okubha ukeekirisha Yeesu na akanwa kaawo ati, “Ni Raatabhugenyi” na ukeekirisha mu-mutima gwawo ati Nyamuwanga :aamusuurire okusooka mu-bhafuuye, oweerusibhwa. Omuunu akeekirisha Yeesu Kiriisitu okusookerera mu-mutima gwaye, kaabharwa ati ni murengeresi mu-meeso ga Nyamuwanga. Na okuturira ku-munwa, omuunu akeekirisha keerusibhwa.



Yowana 3:16,17

Nyamuwanga :eendere muno abhaanu bhoone kutyo abha mu-kyaro. Obhwendi bhuyo mbukora ^naatuma omwana waaye omumwemwe, insonga omuunu woonewoone unu kaamwikirisha asige okubhura, tari abhe na obhurame bhunu bhutakuweera. Nyamuwanga :ataatumire Omwana waaye mu-kyaro, ati aramurire abhaanu, tari abhaanu bheerusibhwe okuturira ku-mwene.



1 Yowana 5:11-13

Gayo nigo Nyamuwanga kaakibhwira ati, akiyaaye obhurame bhunu bhutakuweera. Na obhurame bhuyo kibhunyoorere okuturira ku-kwikirisha Omwana waaye.

Woonewoone unu ari na obhumwi na Omwana wa Nyamuwanga, ari na obhurame bhuyo. Nawe unu atari na obhumwi na Omwana wa Nyamuwanga, obhurame bhuyo atari nabhwo. Enibhakaamira amang'ana gayo, emwe bhanu omwikirisha riisiina rya Omwana wa Nyamuwanga, insonga mumenye ati muri na obhurame bhunu bhutakuweera.



Mataayo 26-28; Ruuka 22-24; Yowana 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Kwaya NT (kya) © 2023, Wycliffe Bible Translators, Inc.
All rights reserved

<https://www.bible.com/bible/3681/MAT.1.KYA>

©2026 Bible for Children, Inc.

www.M1914.org

www.bibleforchildren.org

